

四庫全書

子部

欽定四庫全書

太平御覽卷二百三十

宋 李昉等 撰

職官部二十八

衛尉卿

武庫令

守宮令

公車令

宗正卿

宗正少卿

宗正丞

太僕卿

乘黃令

廐令

車府令

衛尉卿

六典曰衛卿之職掌邦國器械文物之事總武庫武器
守宮三署之官屬少卿為之貳凡祭祀大朝會則供具
羽儀節鉞金戟帷帟茵席之屬

漢書百官表曰衛尉秦官也掌宮門衛屯兵漢因之景
帝初更名中大夫後元年改為衛尉

東觀漢記曰光武二十三年太尉鮑顯兼衛尉永元三年司徒丁鴻兼衛尉

後漢書曰鉞

音遙

期字次况潁川人也拜衛尉卿期重於

信義憂國愛主其有不得於心必犯顏諫諍

續漢書曰陰興為衛尉每諸將出征伐身行勞問無所愛惜

又曰馬光字叔山為衛尉卿上以光謹勅小心周密畏慎特親異之

又曰竇固字孟孫為衛尉卿兩宮宿衛見重當時仁厚
謙恭甚有名稱

又曰趙憲字伯陽為衛尉盡心事上夙夜匪懈母没上
疏乞守服不許遣使釋服

又百官志曰衛尉卿秩中二千石掌官服衛士公車令
百官衛士左右都虞候宮掖門司馬皆屬

魏志曰辛毗為衛尉清平與徐邈胡質皆以憂國忘私
不營產業賜穀二千斛錢三十萬布告天下

又曰田預為并州刺史為衛尉屢乞遜位司馬宣王以預克壯書諭未聽預書答年過七十而以居位譬猶鐘鳴漏盡夜行不休是罪人也遂因稱疾

又曰辛毗字佐治為衛尉卿帝方修殿舍毗諫曰詩云民亦勞止汔可小康

吳志曰嚴峻為孫權從事及稱尊號峻常為衛尉祿賜皆散之親戚知故家常不充

晉書曰石崇拜衛尉與潘岳諂事賈謐與之親善號二

十四友廣成君每出崇降車路左望塵而拜其佞如此
宋書曰南郡王義宣子恢為侍中領衛尉晉代過江不
置衛尉世祖欲重城禁故復置衛尉自恢始也

唐書官品志曰衛尉卿位視侍中掌宮門屯卿每月承
每旬行宮徼糾察不法統武庫令公車司馬令

漢官解詁曰衛尉主宮闕之內衛士於垣下為廬各有
員部凡居宮中者皆施籍於門按其姓名有醫巫僮人
當人者本官長吏為封啓傳審其印信然後內之又有

籍皆復有符用木二寸以所長官兩字為鐵印分符當出入者按籍畢復齒符乃引內之也其有官位得出入者令執御者每傳呼前後以相通從昏至晨分部行夜有夜行者輒前曰誰誰若此不懈終歲更始所以重慎宿衛也

漢書舊儀曰衛尉寺在宮內胡廣云宮闕之內衛士於周垣下為廬者若今之伏宿屋矣

武庫令

六典曰武庫令掌藏邦國之兵仗器械辨其名數國用
丞為之貳

漢書百官表曰執金吾屬官有武庫令

又曰杜欽為大將軍武庫令職閑無事欽所好也

又曰武庫令一人昔武王伐紂散牛放馬倒載干戈韜
以虎皮而藏諸武庫武庫之職由來尚矣

續漢書曰武庫令一人秩六百石主兵器

晉書曰樂廣欲會荆楊士人武庫令黃慶進陶侃於廣

人或非之慶曰此子終當遠到復何疑也

守宮令

六典曰守宮令掌邦國供帳之屬辨其名物會其出入
凡大祭祀大朝會及巡幸則設王公百官位於正殿南
門外

續漢書曰少府屬官有守宮令丞主御紙筆墨及財物
諸用并封書泥之事

魏志曰荀彧字文若年少時南陽何顓異之曰王佐才

也舉孝廉拜守宮令

董巴漢中官傳曰守宮禁內署令秩千石在省內用中人省外士人

齊職儀曰守宮周掌舍之職王行為帷宮即其任也

公車令

漢書曰張釋之為公車令

續漢書曰公車司馬令掌宮南門凡吏民尚書四方貢獻及徵詣公車者皆掌之

又曰周垂字子居拜侍御史公車司馬令不畏強禦以是見怨於幸臣

應劭漢官儀曰公車司馬令周官也秩六百石冠一梁掌殿司馬門徼夜宮天下上事及闕下凡所徵召皆摠領之李邵以公車司馬令為將

宗正卿

六典曰宗正卿之職掌九族六親之屬籍以別昭穆之序并領崇玄署少卿為之貳

漢書曰宗正秦官也

應劭曰周成王時彤伯入為正

掌親屬

又曰劉德字路叔修黃老術有智略少時數言時事召見甘泉宮武帝謂之千里駒昭帝初為宗正丞後為宗正卿德妻死大將軍欲以女妻之不敢取畏盛滿也

又曰劉向字子政元帝時蕭望之周堪薦向宗室忠直明經有行為宗正

東觀漢記曰劉般字伯興遷宗正在朝廷竭忠盡節勤身憂國夙夜不怠數納嘉謀州郡便宜所在以聞受職

修治振施宗族

又曰劉平字公子以仁孝著聞永平三年為宗正卿
後漢書曰劉軫字君文梁孝王肱為宗正率官遂代掌
宗正焉

續漢書曰宗正卿一人秩二千石掌序錄王國嫡庶之
次及諸宗室親屬遠近郡國歲計上宗室名籍

晉起居注曰咸寧元年以太中大夫王覽為宗正卿
又曰太始二年以侍中中書監朱整為宗正卿

後魏書曰杜銓初密太后父豹喪在濮陽世祖欲命迎葬於鄴謂司徒崔浩曰天下謂杜何處望高浩對京兆為美世祖曰朕今方改葬外祖意欲取京兆杜中長老一人以為宗正營護凶事浩曰中書博士杜銓其家今在趙郡是杜預之後於今為諸杜最即命詔之及見銓器貌儼雅世祖感悅謂浩曰此真吾所欲也

唐書官品志曰宗正卿位視列曹尚書主皇室外戚之籍以宗室為之

石氏星經曰宗正二星在帝座東南

山公啓事曰羊祜忠篤寬厚然不長理劇宗正卿缺不
審可轉作否

宗正少卿

魏職令曰宗正卿第四品上第二清用懿清和職恭教
典者先盡皇宗無則用庶姓

宗正丞

六典曰宗正丞掌判寺事

太僕卿

六典曰太僕卿掌邦國廐牧車輿之政令總禁黃典廐典牧章府四署及諸監牧之官屬少卿為之貳凡國有大禮及大駕行幸則供其五輅屬車之屬

尚書冏命曰昔在文武聰明齊聖小大之臣咸懷忠良予命汝作大正正於羣僕侍御之臣

周禮曰太僕掌正王之服位出入王之大命掌諸侯之復逆王眡朝前正位而退入亦如之建路鼓於大寢之

門外而掌其政以待達窮者與遽令聞鼓聲則達逆御僕與御庶子祭祀賓客喪紀正王之服位詔法儀贊王牲事王出入則自左馭而前驅

漢書曰夏侯嬰自上初起沛常為太僕竟高祖世以太僕事惠帝惠帝崩以太僕事高后代王之來嬰與東牟侯入清宮以天子駕迎代王共立文帝復為太僕

又曰百官表曰太僕掌輿馬屬官有大廐未央廐象馬三令又車府路軫

音

靈騎馬駿馬四令又龍馬閑駒索泉

駒駉承華五監長丞又邊郡六牧師苑令各三丞又邊牧索昆蹄令丞皆屬焉

東觀漢記曰祭

側界切

彤膂力過人常貫三百斤弓馬為

太僕從帝過孔子講堂帝指子路室曰太僕吾之禦侮也

後漢書曰徵祭彤為太僕彤在遼東幾三十年衣無魚副顯宗既嘉其功又美彤清約拜日賜錢一百萬馬三匹衣被刀劒下至居屋什物大小無不悉備

續漢書曰趙岐字臺卿獻帝以為太僕持節安慰天下
又百官志曰太僕秩中二千石掌車馬天子出奉駕則
馭

魏志曰國淵字子尼遷太僕居列卿位布衣疏食祿賜
散之舊故宗族以恭儉自守

又曰潘尼字正叔侍中為太僕造乘輿箴

漢舊儀曰太僕牧師苑三十六所分布北邊以郎為苑
監官奴婢三萬人分養三十萬頭擇取給六廐牛羊無

數以給牲犧

漢雜事曰石慶為太僕御出上問車中幾馬慶以策數馬畢舉手曰六馬慶於兄弟最為簡易而猶如此

又曰公孫賀以太僕為丞相子敬聲代為太僕

晉諸公贊曰郭展為太僕留心於養生是以廐馬充牣其後征吳得以濟事

唐書官品志曰太僕卿位視黃門侍郎統馬牧左右牧龍廐內外廐丞

乘黃令

六典曰乘黃令掌天子車輅辨其名數與馴馭之法丞
為之貳

宋書曰乘黃令晉官也主乘輿金根車及安車追鋒諸
衆車馬

齊職儀曰乘黃獸名也龍翼馬身黃帝乘之而仙後人
以名廐

廐令

六典曰典廐令掌繫飼馬牛給養雜畜之事丞為之貳

漢書曰太僕屬官有太廐未央廐象馬三令各五丞一

尉又車府輅輅騎馬駿馬四令丞

晉灼曰漢侯注太廐名也主馬萬疋也

又龍馬閑車索泉

如淳曰廐在索泉宮下

駒駉承華五監長丞牧

索昆蹄令丞

應劭曰索馳昆蹄好馬名也如淳曰因以名廐也

武帝太初元年更名象馬為桐馬

應劭曰主乳馬取其汁桐治之味酢可飲

因以名官也桐動也

又曰蘇武為移中監

移中廐名音移

又曰上官桀遣未央廐令上體不安及愈見馬瘦上怒
曰汝以我不復見馬邪桀曰聖體不安日夜憂懼意識
不在馬言未卒泣數行上以為忠

齊職儀曰諸廐有圉師牧人養馬之官校人掌王之馬
正也

車府令

六典曰車府令掌王公已下車輅辨其名數及馴馭之
法丞為之貳

史記曰趙高為車府令

漢書百官表曰太僕屬官有車府令一人六百石丞一

人

東觀漢記曰永平中車駕出信陽侯陰就干突車騎鹵
薄車府令齊國徐匡乃就車收御者送獄詔書譴匡匡
自繫不出吳良上書言信陽侯驕慢干突車騎為大不
敬匡執法守正而下獄臣恐陛下聖化由是墮矣於是
詔出匡猶左遷良為郎丘長

齊職儀曰車府署周有巾車典路之職辨五輅之制



太平御覽卷二百三十

欽定四庫全書

太平御覽卷二百三十一

宋 李昉等 撰

職官部二十九

大理卿

大理少卿

大理正

大理丞

廷尉監

廷尉評

大理卿

六典曰大理卿之職掌邦國折獄詳刑之事以五聽察其情一曰氣聽二曰色聽三曰視聽四曰聲聽五曰詞聽三慮盡其理一曰明慎以讞疑獄二曰哀矜以雪冤獄三曰公平以鞠庶獄少卿為之貳

韋昭辯釋名曰廷尉縣尉皆古官也以尉尉民也凡掌賊及司察之官皆曰尉尉罰也言以罪罰姦非也

尚書帝曰皋繇汝作士明于五刑以弼五教

論語曰孟氏使陽膚為士師

士師典獄之官

問於曾子曾子曰

上失其道民散久矣如得其情則哀矜而勿喜

韓詩外傳曰晉文公使李離為理過聽殺人自拘於廷
請死於君君曰官有貴賤罰有輕重下吏之罪非子之
罪也離曰法失則刑失刑失則死臣居官為長不與下
吏讓位爵為多不與下吏分利君以為能聽微決疑故
使臣為理今過聽殺無罪罪當死臣不能以虛自誣遂
伏劍死君子曰忠矣仁矣

家語曰季羔為衛士師則人之足俄而有亂季羔逃則

者守門謂羔曰彼有缺羔曰君子不隧又曰此有室季羔入焉既罷羔問曰吾親刖子之足而子逃我何也刖者曰曩者君理人以法令先君後臣欲臣之免也臣知之臨當論刑君愀然不樂見於顏色臣又知之君豈私臣哉天生君子其道固然此臣之所以脫君也孔子聞之曰善哉為吏其用法一思仁恕則樹德加嚴暴則樹怨公以行之其子羔乎

史記天官書曰斗魁四星貴人之牢曰大理

漢書曰廷尉秦官掌刑辟有正右左監景帝中六年更名大理武帝建元四年復為廷尉

又曰于定國為廷尉為人卑恭尤重經術其決獄平法務在哀矜罪疑從輕加審慎之心朝廷稱之曰張釋之為廷尉天下無冤民于定國為廷尉民自以不冤

又曰朱博遷廷尉恐為官屬所誣召見正監典法掾吏謂曰廷尉本起於武吏不明法律幸有衆賢亦何憂然廷尉治郡斷獄以來二十年亦獨耳剝日久

剝劫也
足妙反三

尺律令人事出其中試與正監共撰前代決事吏議難知者數十事持問廷尉將為諸君覆之正監條白博皆召掾吏為平處其輕重十中八九官屬咸服

又曰張釋之為廷尉文帝嘗行有人從渭橋下出乘輿馬驚捕之屬廷尉釋之奏其犯蹕當罰金上怒釋之曰法者所與天下公共也方以其時誅之則已今以下廷尉廷尉天下之平也一傾天下用法皆為之輕重民安所措其手足乎後有盜高廟座前玉環者文帝令族之釋

之奏當棄市上大怒釋之曰法如是也今盜宗廟器而族之如今愚人取長陵一杯土陛下何以加其法乎

又曰張湯為廷尉決大獄欲傳古義乃請博士弟子治尚書春秋補廷尉史平亭疑法奏讞疑事必先為上分別其原以揚主之明言此自天子意非由有司也奏事有善則讓曰監掾史所為也

亭者平也均也

又曰杜周為廷尉其治大數張湯而善候伺上所欲客謂周曰君為天下決平不循三尺法

以三尺竹簡書法律令

專以

主意為獄獄者固如是乎周曰三尺安出哉前主所是
著為律後主所是疏為令當時為是何古之法乎至周
為廷尉獄亦益多矣二千石繫者新故相因不減百餘
人

又曰王先生者善黃老言處士也張釋之召居廷中王
生年老與釋之及公卿會廷中立王生襪解顧謂釋之
為我繫襪釋之前跪而繫之既退或讓王生曰何廷辱
張廷尉乎王生曰廷尉方為天下名臣吾聊使繫襪欲

重之諸公聞之賢王生而重張廷尉

又曰下邳翟公為廷尉賓客填門及免官門外可設雀羅復為廷尉乃署其門曰一死一生乃知交情一貴一賤交情乃見

又曰文帝初立聞河南守吳公治為天下第一故與李斯同邑乃徵吳公為廷尉

又曰孔光為廷尉時定陵淳于長坐大逆誅長少妻乃始等六人皆以長事未發覺時棄去或更嫁及長事發

丞相翟方進等議乃始等於法無以解論光以為夫婦之道有義則合無義則離乃始或嫁義已絕而欲以為妻論殺之名不正不當坐有詔以光議定

東觀漢記曰陳寵為廷尉有疑獄輒手筆作議所活者甚多

後漢書曰郭躬為廷尉躬家世掌法務寬平乃條諸重文可從輕者四十一事奏之事皆施行著于令

又曰郭躬字仲孫為廷尉正遷廷尉家世掌法弟子鎮

自廷尉左監遷廷尉凡郭氏為廷尉者七人

後漢書曰楊賜遷廷尉乃嘆曰昔三后成功惟殷于民

而咎繇不與焉蓋去之也

去耻也

遂以世非法家固辭

謝承後漢書曰范延壽宣帝時為廷尉時燕趙之間有三男共娶一妻生四子長各求離別爭財分子至聞于縣縣不能決獄讞之于廷尉於是延壽決之以為悖逆人倫比之禽獸生子屬其母以子並付母尸三男于市奏免郡太守令長等無師化之道天子遂可其言

又曰傳賢遷廷尉素廉正自掌法官無私門賓客公卿宴會要請不往自以為貧無以報答其施常垂念刑法務從輕比至斷獄遲徊流涕在位四年治獄稱平

華嶠後漢書曰吳雄字季高以明法律斷獄平桓帝時為廷尉雄子訢孫恭三世相承為廷尉為法名家

漢官儀曰光武時有疑獄見廷尉曹史張禹所問輒對處當詳衷於是冊免廷尉以禹代之雖越次而授亦足以勵其臣節也

魏志曰高柔字文惠陳留圉人遷廷尉頃之護軍營士
竇禮近出不還營以為亡表言逐捕沒其妻盈及男女
為官奴婢盈連至州府稱冤自訟莫有省者乃辭詣廷
尉柔問曰汝何以知夫不亡盈垂泣對曰夫少單持養
一老嫗為母事甚恭謹又哀兒女撫視不離非是輕狡
不顧家室者也柔重問曰汝夫不與人怨讎乎對曰夫
良善與人無讎又曰汝夫不與人交錢財乎對曰嘗出
錢與同營士焦子文久求不得時子文適坐小事繫獄

柔乃見子文問所坐言次曰汝頗曾舉人錢否子文曰
自以單貧初不敢舉人物也柔察子文色動遂曰汝昔
舉賓禮錢何言不舉耶子文怪知事露應對不次柔曰
汝已殺禮便宜早服子文於是叩頭具首殺禮本末埋
藏所柔使吏卒承子文辭往掘即得屍詔書復盈母子
為平民班示天下以禮為戒

又曰高柔字文惠遷廷尉時獵法甚峻而宜陽典農劉
龜竊於禁內射兔其功曹張京詣校事言之帝匿名收

龜付獄柔請告者名帝大怒曰劉龜當死乃敢獵吾禁地送龜廷尉廷尉便當考掠何復請告者名吾豈妄收龜耶柔曰廷尉天下之平也安得以至尊喜怒而毀法乎重復為奏辭旨深切帝意寢乃下張京名即還訊各當其罪

又曰鍾毓遷廷尉聽君父已沒臣子得為理謗又士為侯其妻不復改嫁毓所創也

晉書曰孔坦字君平遷侍中廷尉多平當法合人情而

時勢要自以愛憎為斷坦意不得皆行也

晉中興書曰范堅為尚書右丞於時廷尉奏邵廣盜官慢合布四十疋依律棄市廣息雲宗二人自沒為官奴婢以贖父尚書議可特聽堅駁之曰此為施一恩於今開萬怨於後顯宗從之正廣刑

又曰王彪之遷廷尉時永嘉太守謝毅赦後殺郡人周矯矯從兄球詣州訴冤揚州刺史殷浩遣從事收毅付廷尉彪之以球為獄主身無主爵非廷尉所科不肯受與

州相反覆穆帝發詔令受之彪之又上疏執據時人云
張釋之以來復見斯事

後魏書曰崔光韶遷廷尉卿時秘書監祖瑩以贓罪被
劾光韶欲致之重法太尉城陽王徽尚書令臨淮王彧
吏部尚書李神雋侍中李彧並勢望當時皆為瑩求寬
光韶正色曰朝賢執事於舜之功未聞有一如何反為
罪人言乎其執意不回如此

隋書曰文帝時議置六卿將除大理盧思道奏曰省有

駕部寺留太僕省有刑部寺除大理斯則重畜產而賤
刑名也

又曰楊注字元度守大理卿注視事二日帝將親省囚
徒其時繫囚二百餘人注通宵究審詰朝而奏曲盡事
情一無遺誤帝甚嘉之

唐書官品志曰廷尉卿梁國初建曰大理天監元年復
改為廷尉有正監平三人元會廷尉三官與建康三官
皆法冠玄衣朝服以監東西中華門手執方木長三尺

方一寸謂之執方

又曰郎楚之武德初為大理卿與太子少保李綱侍中陳叔達撰定律令

又曰劉德威授大理卿太宗嘗問之曰近來刑網稍密其過安在德威奏言誠在主上不由臣下人主好寬則寬好急則急律文失入減三等失出減五等今則反是失入則無辜失出獲大罪所以吏各自愛競執深文非有教使之然畏罪之所致耳陛下但捨所急則寧失不

經復行於今日矣太宗深然之

又曰高宗問大理唐臨獄繫囚之數臨對曰見囚五十餘人唯二人合死上以為囚數不多怡然形於顏色謂臨曰昔東宮卿已事朕朕承大位卿又居近職以疇日相委故授卿此任然為國之要在於刑法急則人殘法寬則失罪務令折中稱朕意焉

又曰張文瓘為大理卿旬日決遣疑獄四百餘條其得罪者皆無怨言文瓘嘗有疾繫囚相與設齋以禱焉尋

拜侍中兼太子賓客大理囚一時慟哭其得人心如此
又曰大理卿袁仁敬暴卒繫囚聞之皆慟哭悲歌曰天
不恤冤人兮何奪我慈親兮有理無申兮痛哉安訴陳
兮

又曰龍朔二年改大理卿為訴刑寺正卿

唐新語曰唐臨為大理卿初蒞職斷一死囚先時坐死
十餘人皆他官所斷會太宗幸寺親錄囚徒他官所斷
囚皆稱冤不已臨斷者嘿而無言太宗怪之問其故囚

對曰唐卿斷臣必不枉濫所以絕意太宗歎息久之曰
為獄固當若是因遂見原

五代史後唐書曰長興二年八月敕令後大理寺官員
宜同臺省官例升進其法直官比禮直官任便

會稽典錄曰盛吉字君達為廷尉性多哀憐其妻謂吉
曰君為天下執法不可使一人濫罪殃及子孫其囚無
屑嗣者令其妻妾得入使有遺類視事十二年天下稱
有恩

又曰董昆字文通餘姚人也遷廷尉卿持法清峻不發私書

又曰盛吉拜廷尉吉性多仁恩務在哀憐每至冬日罪囚當斷其妻執燭吉手持丹筆夫妻相向垂泣

會稽後賢記曰孔坦遷廷尉卿獄多囚繫坦到官躬執辭狀口辨曲直小大以情不加楚撻每臺司錄獄無所顧問皆面決當時之事

天文錄曰平星主建廷平主天下之獄事若今廷尉之

象故星讚曰平星執正綱紀也

文子曰臯陶喑為大理天下無虐刑有貴乎言者也

說苑曰楚令尹子文之族有干法者廷理拘之聞其令尹之族也而釋之子文召廷理而責之遂致其族人於廷理曰不是刑吾將死廷理懼遂刑其族人成王聞之不及履而至子文之室曰寡人幼小置廷理其人以違夫子之意於是出廷理而尊子文之意反內政

新序曰楚昭王時石奢為理有殺人者奢追之則其父

也奢曰以父成政不孝也不行君法非忠也遂刎頸而死

摯虞新禮儀曰故事祀臯陶於廷尉寺祀以社日新禮改以孟秋之月以應秋政

大理少卿

後魏職令曰廷尉少卿第四品上第二清用思理平斷
明刑識法者

北齊書曰宋世軌為廷尉少卿時大理正蘇珍之亦以

平幹知名寺中為之語曰決定嫌疑蘇珍之視表見裏
宋世軌謂之寺中二絕卒官廷尉御史諸囚皆哭曰宋
廷尉死我等豈有生路也

隋書曰趙綽為大理少卿侍郎辛亶嘗衣緋視俗云利
官文帝以為厭蠱將斬之綽曰據法不當死臣不敢奉
詔上怒甚令斬綽綽解衣當斬上使人問曰竟如何綽
曰執法不敢惜死上良久釋之他日又令斬二人綽曰
此人坐當杖殺之非法上曰不關卿事綽曰陛下置臣

法司欲誤殺人豈得不關臣事上曰撼大木不動者當退綽曰臣冀感天心何論大木上乃止時薛胄為大理卿胄斷獄以情而綽守法俱為稱職

又曰源師煬帝即位拜大理少卿帝在顯仁宮勅宮外衛士不得輒離所守有一主帥私令衛士出外帝付大理繩之師據律奏徒帝令斬之師奏曰此人罪誠難恕若陛下初便殺之有司不關文墨既付有司義歸恒典脫宿衛近侍者更有此犯將何以加之帝乃止

唐新語曰太宗嘗謂侍臣曰大理之職人命所懸當須妙選正人用心存法無過戴胄者乃以為大理少卿

又曰徐有功遷司刑少卿時周興來俊臣等羅告天下衣冠遇族者數千百家有功居司刑平反者不可勝紀時人方之于定國

大理正

六典曰大理正掌參議刑獄詳正科條之事凡六丞斷罪不當則以法正之

禮記曰成獄辭史以獄成告於正正聽之鄭玄注云於周禮鄉師之屬今漢有正平丞秦所置也

東觀漢記曰何敞六世祖比干遷廷尉正張湯為廷尉以殘酷見任增飾法律敞常爭之存者千數

漢書曰黃霸字次公宣帝在民間時知百姓苦吏聞霸理法平召為廷尉正及夏侯勝非議下廷尉獄霸從勝受尚書

謝承後漢書曰陳琳字伯真橋玄表琳明律令徵拜廷

尉正

魏志曰司馬芝字子華遷大理正有盜官練置都厠上者吏疑女工收以付獄芝曰夫刑罪之失失在苛暴今贓物先得而訊其辭若不勝掠或至誣服誣服之情不可以折獄且簡而易從大人之化也不失有罪庸世之治耳以今有所疑以隆易從之義不亦可乎太祖從其議

晉書曰江統字應元為廷尉正作三刑議

又曰廷尉三官通視南臺持書舊尚書郎下遷梁制服
獬豸冠介幘皂衣銅印墨綬

晉中興書曰顧榮字彥先入洛以南土秀望累遷廷尉
正

南史曰顧協少清介有志操初為廷尉正冬服單薄寺
卿蔡法度欲解褐與之憚其清嚴不敢發口謂人曰我
願解身上襦與顧郎顧郎難衣食者竟不敢以遺之

大理丞

六典曰大理丞掌分判寺事凡有犯皆據其本狀以正刑名徒以上各呼囚與其家屬告以罪名問其狀歟不伏則聽自理

唐書曰杜景佺徐有功為司刑丞與來俊臣侯思止同理獄人稱之曰遇徐杜必生過來侯必死

唐新語曰李日知為司刑丞嘗免一死囚少卿胡元禮異判殺之與日知往復至於再三元禮怒遣府史謂日知曰元禮不離刑曹此囚無不死法竟以兩聞日知果

直

廷尉監

漢書曰邴吉字少卿稍遷廷尉監治巫蠱獄

謝承後漢書曰陳咸字子威為廷尉監執獄多恩議人常從輕比多所全活皆稱其恩

晉起居注曰廷尉監陸鷹上表求增築訊堂圖書先賢像詔許之

廷尉評

六典曰大理評事掌出使推按凡承制而出推長吏據
狀合停務及禁錮者先請魚書以往據所授之狀鞠而
書之若詞有反覆不能首實者則依法拷之凡大理斷
獄皆連署焉

漢書曰宣帝詔曰今遣廷吏與郡鞠獄任輕祿薄其為
置正平員四人其務平之涿郡太守鄭昌上言曰聖王
立法明刑者非以為理救衰亂之起也今明主躬垂明
聽不置廷平獄將自正若開後嗣不若刪定律令律令

一定愚人知所避就姦吏無所弄法今不正其本而置
廷平以理其末代衰德怠則廷平將招權而為亂首也
宣帝始置左右平而三輔決錄注云何比干漢武時為
廷尉右平謬矣

又曰馬宮字游卿行能高潔遷廷尉評

又百官表曰宣帝地節三年初置左右平四人秩百石
晉中興書曰顧榮字彥先遷廷尉評時趙王欲殺淮南
王允官屬下廷尉議罪榮具明刑理不宜廣濫倫意解

賴榮濟者甚衆

隋書曰廷尉平置一人第六品下後改為評事

唐新語曰敬昭道為大理評事時沂州有反者誅誤坐者四百餘人將隸于司農未即路繫在州獄昭道援赦文判而免之時宰相責大理奈何免反人家口大理羣官失色引昭道以見執政怒而責之昭道曰赦云見禁囚徒反者家口繫在州獄此即見禁也反覆詰對至於五六執政無以奪之誅誤者悉免

三輔決錄注曰茂陵何比干漢武時丞相公孫弘舉為
廷尉右平獄無冤民號曰何公

太平御覽卷二百三十一

欽定四庫全書

太平御覽卷二百三十二

宋 李昉等 撰

職官部三十

鴻臚卿

鴻臚少卿

典屬國

司農卿

司農少卿

上林苑令

太倉令

導官令

太府卿

太府少卿

市令

平準令

左右藏令

鴻臚卿

六典曰鴻臚卿之職掌賓客及凶儀之事領典客司儀
二署以率其官屬而供其職務少卿為之貳凡四方夷
狄君長朝見者辨其等位以賓待之凡二王之後及夷
狄君長之子襲官爵者皆辨其嫡庶詳其可否若諸蕃

大首渠有封禮命則受冊而往其國

韋昭辨釋名曰腹前肥者臚言以京師為心腹王侯外國為四體以養之也辨云鴻臚本故典客掌賓禮鴻大也臚陳序也欲以陳序賓客也

漢書曰田序字子公連擒大姦徵為大鴻臚

又曰典客秦官掌諸侯歸義蠻夷有丞景帝六年更名大行令武帝太初元年更名鴻臚

東觀漢記曰大鴻臚漢舊官建武元年復置屬官有丞

一人大行丞一人有治禮員四十七人主齊祠饗贊九賓之禮

續漢書曰大鴻臚卿一人中二千石諸王入朝當郊迎典其禮儀及郡國上計并屬焉皇子拜王贊授印綬及拜諸侯嗣子及四方夷狄封者鴻臚召拜之

謝承後漢書曰陳紀字元方遭父太丘長寔憂嘔血絕氣豫州嘉其至行表上尚書圖畫百城以勵風俗袁紹以太尉讓紀紀不受拜大鴻臚卒官子羣為三公天下

以為公慙卿卿慙長

又曰白嵩字季山為濟南相甘露降於郡安帝嘉其致瑞徵拜大鴻臚

漢官解詁曰鴻聲也臚傳也所以傳聲贊導九賓也

又曰昔唐虞賓於四門此則禮賓之制與鴻臚之任亦同

漢雜事曰蕭由為陳留太守入為鴻臚不任賓贊還官魏志曰崔林字得儒清河東武城人也遷大鴻臚龜茲

王遣侍子來朝朝廷嘉其遠至褒賞其王甚厚餘各國遣子來朝間使連屬林恐所遣或非真的權取疏屬賈胡因通使命利得印綬而道路護送所損滋多勞所養之民資無益之事為夷狄所笑此曩時之所患也乃移書燉煌諭旨并錄前世待遇諸國豐約使有恒常

魏略曰韓宣字景然為大鴻臚始南陽韓暨以宿德在宣前為大鴻臚及宣在官亦稱職故鴻臚中為之語曰大鴻臚小鴻臚前後治行何相如

蜀志曰杜瓊字伯瑜後主立為大鴻臚為人靜嘿少言
闔門自守不與世事

吳志曰張儼字子節吳人也弱冠知名早歷顯位以博
聞多識拜大鴻臚使於晉皓謂儼曰南北通好以君有
出境之才故相屈行對曰皇皇者華臣蒙其榮懼無古
人延譽之美磨厲鋒鏑思不辱命既至車騎將軍賈充
尚書令裴秀侍中荀勗等欲傲以所不知而不能屈尚
書僕射羊祜尚書何禎並結縞帶之好

唐書官品志曰鴻臚卿位視尚書右丞掌導護贊拜

山濤啓事曰鴻臚職主胡事前後為之者率多不善了
今缺當選御史中丞刁攸不審可爾不

鴻臚少卿

後魏職令曰鴻臚少卿第四品上第二清用雅學詳當
機樞達理者

隋書曰煬帝時蠻夷朝貢前後相屬帝從容謂宇文述
虞世基等曰四夷率服觀禮華夏鴻臚之職須歸今望

寧有多才藝美容儀可以接對賓客者為之乎咸以蘇
夔對帝然之即日拜鴻臚少卿

典屬國

漢書曰武帝以移

音移

中監蘇武為典屬國

又曰宣帝甘露二年以常惠為典屬國

又曰典屬國秦官掌蠻夷降者成帝河平元年省併大
鴻臚

司農卿

六典曰司農卿之職掌邦國倉儲委積之事總上林太倉鈎盾導官四署與諸監之官屬謹其出納而修其職務少卿為之貳凡京都百司官吏祿廩皆仰給焉

周禮曰冢宰有大府下大夫鄭玄注云大府為王治藏之長若今司農矣

史記曰韓信歸漢漢以為治粟內史

漢書曰治粟內史秦官掌穀貨景帝更名大農今武帝更名大司農

又曰鄭當時字莊為司農門下客至無貴賤無留門者
執賓禮以下人山東諸公翕然稱鄭莊上曰吾聞鄭莊
行千里不齎糧

又曰朱邑為北海太守以治行第一入為大司農身為
列卿居處節儉性公正不可交以私天子器之朝廷敬
焉及卒詔稱揚其節行賜邑子黃金百斤以奉其祭祀
又曰田延年為大司農坐盜都內錢三十萬自殺

又曰平帝元始元年改大司農曰羲和以劉歆為之

東觀漢記曰劉據為大司農以職事被譴召詣尚書將加箠撻尚書左雄諫帝曰九卿位亞三公行則鳴玉孝明永平始加朴罰非古制也帝從之九卿於是始免朴撻

又曰高詡字季回以儒學徵拜大司農在朝以清白方正稱

又曰辛融字子優為大司農性明達稱為名卿

續漢書曰李固為大司農上信閣官天下牧守多其宗

親舊故及受貨賂有詔特拜不由選試亂生彌甚固乃上表具陳盜賊所以興由官非其人也

又曰大司農卿一人中二千石掌諸錢穀金帛

又曰趙典字仲經為大司農閉門却掃非德不交

又曰耿國字叔慮為大司農曉邊事能論議數上便宜事天子器之

又曰鄭玄公車徵為大司農給安車一乘所過長吏送迎張璠漢記曰陳寵為廣漢太守風聲大行入為大司農

應劭漢官儀曰大司農古官也唐虞分命羲和四子敬授民時高祖受命懲秦之弊與民休息逮至文景國家無事家給人足京師之錢累百巨萬貫朽而不可校太倉之粟陳陳相因充溢露積腐敗而不可食

魏志曰梁習為并州二十餘年政治為天下最乃徵拜大司農

吳志曰樓玄為大司農玄從九卿持刀侍衛正身率眾奉法而行應對切直數廷詰意漸見責怒後人誣白玄

與賀劬相逢駐車耳語大笑謗訕政事遂被詔詰責送
廣州

晉陽秋曰司農桓範字元則出奔曹爽云大司農印在
吾手中所在得開倉而食

宋書曰大司農卿一人書稱棄后稷其職也

齊職儀曰司農卿耕籍則掌其禮儀

隋書曰趙元淑轉潁川太守甚有惠政因入朝會司農
不時納諸郡租穀元淑奏之帝謂元淑曰如卿意者幾

日當了元淑曰如臣意不過十日帝即日拜元淑為司農卿納天下租如言而了帝悅焉

唐書官品志曰司農卿位視散騎常侍主農功倉廩統太倉導官籍田上林令

韓揚天文要集曰天倉者大司農也

異苑曰吳郡岑淵為吳郡時大司農卿碑注在江乘湖西太元中村人見龜載從田中出還其先處萍藻猶著腹下

史游急就篇曰司農少府國之泉也

司農少卿

後魏職令曰司農少卿第五清用堪勤有幹能者

唐書曰韋宏機為司農少卿受詔檢校東都營田園苑之事高宗謂之曰兩都是朕東西二宅也今之宮館隋代所造歲序既淹漸將頽頽欲有修造又費財力何如宏機奏曰臣任司農向已十年前後省費今見貯錢三千萬貫若以供葺理可不勞而就也上大悅之

上林苑令

漢書百官表曰水衡屬官有上林令

續漢書曰上林苑令六百石主苑中禽獸有民居皆主之捕得獸送大官

李邵別傳曰邵以郎謁者為上林苑令

揚雄上林苑令箴曰芒芒天田芃芃作穀山有陵陸野有林麓夷原汙藪禽獸攸伏魚鼈以時芻蕘咸植國以殷富民以家給

太倉令

六典曰太倉署令掌九穀廩藏之事承為之貳凡鑿窖置屋皆銘甄為庾斛之數與其年月日受領粟官吏姓名又立碑如其銘焉

漢書曰淳于意為太倉令

續漢書曰太倉令一人秩六百石主受郡國轉漕穀

梁冀別傳曰太倉令秦宮出入冀妻壽所語言飲食獨

往獨來屏去御者

宮冀蒼頭

壽姊夫宗忻不知書因壽氣力

起家拜太倉令

齊職儀曰太倉令周司徒屬官有廩人倉人則其職也

導官令

六典曰導官令掌導擇米麥之事凡有九穀之用皆隨其精麤差其耗損而供之

漢書百官表曰少府屬官有導官

如淳曰太官之別主酒也

續漢書曰導官令一人主春御米及作乾糒導擇也

太府卿

六典曰太府卿之職掌邦國賦貨之事總京都四市平
准左右藏常平八署之官屬舉其綱目修其職務少卿
為之貳以二法平物一曰度量二曰權衡

周禮曰天官屬有太府下大夫掌貢賦受其貨賄之入
梁書曰天監七年置太府班第十三掌金帛府帑統右
藏令上庫丞太市南北市令關津亦皆屬焉

後魏書曰楊播字延慶弘農華陰人也播少修勅奉親
盡禮累遷右衛將從車駕南巡到懸瓠除太府卿

唐書曰楊崇禮為太府少卿雖錢帛充仞丈尺間皆自
省閱時議以為稱職擢拜太府卿每歲勾剝省便常出
數百萬貫在職二十年公清如一時太平日久御府財
物山積以為經楊卿者無不精好

唐書官品志曰太府卿位視宗正掌金帛府帑統右藏
令

太府少卿

後魏職令曰太府少卿第四品上士人官上用勤篤有

幹細務無滯者

唐新語曰狄光嗣仁傑長子也睿宗朝起復除太府少卿光嗣頻表不起乃降勅曰朕念卿家門忠於王室奪情禮以答殊恩卿屢表固陳詞理懇至循環省覽有足可矜今遂所請用勸浮薄待卿情禮云畢更候後命仍編入史

市令

六典曰京都諸市令掌百族交易之事丞為之貳凡建

標立候陳肆辨物以二物平市

謂稱以格
斗以概也

以三賈均平

事

精為上賈次為
中賈麗為下賈

凡賣買不和而權固

權謂專略其利
固謂鞏固其市

及更出開閉共限一價

謂賣物以賤為貴
買物以貴為賤也

若參市而規

自入者並禁之

謂在旁高下其
價以相惑亂

史記曰司馬談祖為漢市長

漢書百官表曰內史屬官有長安市長又長安西市令

長丞屬左馮翊

東觀漢記曰祭遵從征河北為軍市令舍中兒犯法遵

格殺之上怒命收遵時主簿陳副諫曰明公常欲衆軍整齊今遵奉法不避是教令行也上乃貸之以為刺姦將軍語諸將曰當備祭遵吾舍中兒犯令尚殺之必不私諸卿也

晉書曰石苞賣鐵鄴市市長沛國趙元儒名知人見而異之便與結交歎其遠量當至公輔

齊職儀曰市令周有司廛肆師司市皆其任也

平準令

六典曰平準令掌供官市易之事丞為之貳凡百司不任用之物則以時出貸其沒官物者亦如之

韋昭辨釋名曰釋云平準令主染色色有常平之法准的之也辨云主平物價使相依准

史記曰桑弘羊以物多騰躍請置平準於京師受天下委輸盡籠天下之貨物貴則賣之賤則買之如此則富商大賈無所牟大利矣始置平準焉

前漢書百官表曰司農屬官有平準令丞

漢書曰趙廣漢清潔下士有名譽州舉茂才拜平準令
續漢書曰平準令六百石

齊職儀曰染署掌染繒色少昊置五雉為工正翬雉氏
設五色之工周有染人之職掌染絲帛以為服

左右藏令

六典曰左藏令掌邦國庫藏之事丞為之貳凡天下賦
調先於輸場閱其合尺度斤兩者卿及御史監閱然後
納于庫藏皆題以州縣年月以別麁良以辨新舊也

又曰右藏令掌邦國寶貨之事丞為之貳凡四方所獻金玉珠貝玩好之物皆藏之出納禁令如左藏之職

齊職儀曰右藏庫周天府內府之任天府物所藏也內府掌邦布之出入以待王用後漢中藏府令丞掌幣帛金銀諸物晉置中黃左右藏

太平御覽卷二百三十二

欽定四庫全書

太平御覽卷二百三十三

宋 李昉等 撰

職官部三十一

秘書監

秘書少監

秘書丞

秘書郎

秘書監

六典曰秘書監之職掌邦國經籍圖書之事有二局一

曰著作二曰太史皆率其屬而脩其職少監為之貳
東觀漢記曰桓帝延嘉二年初置秘書監掌典圖書古
今文字考合異同

華嶠後漢書曰學者稱東觀為老氏藏室道家蓬萊山
王融曲水詩序曰記言事於仙室謂藏室也

魏志曰王象字義伯散騎常侍領秘書監撰皇覽

魚豢魏略曰蘭臺臺也而秘書署耳

王隱晉書曰王沉為秘書監著魏書多為時諱而善序

事

又曰羊祜為黃門郎陳畱王立以少帝不願為侍臣徙為秘書監

又曰惠帝永平元年詔云秘書監經理經籍考校古今課試署吏領有四百人宜專其事

鄧粲晉紀曰華譚為秘書自負宿名意每怏怏常從容謂上曰臣老於秘閣矣汲黯之言復存今日上不悅

晉諸公讚曰荀勗領秘書監太康二年汲郡冢中得竹

書昴躬自撰次注寫以為中經列於秘書經傳闕文多
所證明

又讚曰庾峻自司空長史秘書監幽讚符命天文地理
因有述焉

何法盛晉中興書曰孫盛字安國為秘書監篤尚好學
自少及長常手不釋卷既居史官乃著三國陽秋

沈約宋書百官志曰秘書監丞各一人郎四人魏武建
國有秘書令左右丞黃初中分秘書立中書而秘書之

局不廢昔漢武帝建藏書之冊置寫書之官於是天下
文籍皆在天祿石渠延閣廣內秘書之室謂之秘書至
成哀世使劉向父子以本官典其事至于後則圖籍在
東觀有校書郎又有著作郎傅毅馬融之徒多為校書郎又蔡邕從尚書選入東
觀著作邕既已為尚書郎而入東觀著作復拜議郎知是著作郎也又碩學達官徃徃典
校秘書如向歆故事或但校書東觀或有兼撰漢記也
梁書曰任昉字彥昇為秘書監自齊永元以來秘閣四
部篇卷紛雜昉手自讐校由是篇目定焉

後魏書曰伊馥世祖欲拜馥為尚書郡公馥辭曰尚書
務殷公爵至重非臣年少愚近所宜荷任請收過恩世
祖問其欲馥曰中秘二省多諸文士若恩矜不已請參
其次世祖賢之遂拜為中護將軍秘書監

隋書曰柳詵煬帝嗣位拜秘書監封漢南縣公帝退朝
之後便命入閣言宴諷讀終日而罷帝每與嬪后對酒
時逢興會輒遣命之至與同榻共席恩若朋友帝猶恨
不能夜召於是命匠刻木偶人施機關能坐起拜伏以

像於誓帝每在月下對酒輒令宮人置之於座與相酬酢而為懽笑

唐書曰魏徵為秘書監奏引學者校定四部書自是秘府圖籍粲然畢備

劉歆七略曰武帝廣獻書之路百年之間書積如丘山故外有太常史官博士之藏內則延閣廣內秘室之府魚豢典略曰云臺香辟紙魚蠹故藏書臺稱云臺

三輔黃圖曰未央宮東有麒麟殿藏秘書即揚雄校書

之處也

王充論衡曰蘭臺之官監國得失也

通典曰秘書省但主書寫勘校而已雖非要劇然好學君子亦多求為之

溫嶠舉荀崧為秘書監表曰夫國史之興將以明得失之跡謂之實錄使一代之典煥然可觀散騎常侍崧文質彬彬思義通博歷位先朝蒞事以穆宜掌秘奧宣明史籍

魏王肅表曰青龍之末主者啓選秘書監詔秘書騶吏
以上三百餘人非但學問義理當聞有威嚴能檢下者
詔肅以常侍領焉

又王肅論秘書不應屬少府表曰魏之秘書即漢之東
觀郡國稱敢言之上東觀且自大魏分秘書而為中書
以來傳緒相繼於今三監未有隸名於少府者也今欲
使臣編名於騶隸言事於外府不亦隳朝章而辱國典
乎太和之中蘭臺秘書爭議三府奏議秘書司先王之

載籍掌制書之典謨與中書相亞宜與中書為官聯

華嶠集詔曰尚書嶠體素弘簡文雅該通經覽古今博
聞多識屬書實錄有良史之志故轉為秘書監其加散
騎常侍使中書散騎著作及治禮音律天文數術南省
文章門下撰集皆典領之嶠表曰伏見詔書以臣為秘
書監加位常伯昔劉向父子世典史籍馬融通博三入
東觀非臣膚淺所敢投跡

唐書太宗正授顏師古秘書監制曰秘書望華史官任

重選重而舉歷代攸難守秘書監顏師古體業淹和器
用詳敏學總流略詞兼典麗職司圖書亟經歲序朱紫
既辨著述有成宜正名器允茲望實可秘書監

秘書少監

唐書曰周思茂者貝州漳南人少與弟思鈞俱早知名
自右史轉太子舍人與范履冰在禁最蒙親遇至於政
事損益多參預焉累遷麟臺少監崇文館學士垂拱四
年下獄

又曰王紹宗揚州江都人也遷秘書少監仍侍皇太子
讀書紹宗性澹雅以儒素見稱當時朝廷之士咸敬慕
之張易之兄弟亦厚之伏誅紹宗坐以交往見廢

又曰德宗以左諫議大夫史館脩撰張薦為秘書監脩
撰如故時裴延齡貴欲異同宰府乃言於上曰諫議大
夫論朝廷得失之官史館修撰書朝廷得失之事則領
史職者不宜為諫官故有斯命

秘書丞

魏志曰武帝置秘書左右丞以劉放為秘書左丞孫資為秘書右丞

魏略曰薛夏字宣聲天水人也博學有才華天水舊有姜任閭趙四姓常推於郡中而夏為單家不為降屈四姓欲治之夏乃遊逸東詣京師太祖宿聞其名甚禮遇之文帝又嘉其才黃初中為秘書丞帝常與夏推論書傳未嘗不終日也每呼之而不名謂之薛君夏居甚貧帝又顧其衣薄解御袍賜之其後征東將軍曹休來朝

時帝方與夏有所諮論而外啟休到帝引入坐定帝顧夏言之于休曰此君秘書丞天水薛宣也宜共談其見過如此

魚豢魏略曰薛夏為秘書丞時秘書嘗公事移蘭臺蘭臺自以臺也秘書丞時為署耳謂不得儀當有坐者夏報之曰蘭臺為外臺秘書為內閣臺也閣也何不相移之有蘭臺無以折之

又曰嚴邕以高才黃初中為秘書丞數奏文賦帝甚異

之

晉書曰嵇紹以父得罪靖居私門山濤領選啟武帝曰
康誥有言父子罪不相及嵇紹賢侔郗缺宜加旌命請
為秘書郎帝謂濤曰如卿所言乃堪為丞何但郎也乃
發詔徵之起家為秘書丞

王隱晉書曰庾峻字山甫博學有才為秘書丞遍觀古
今聞見益優

虞預晉書曰何楨字元幹廬江人也為尚書郎特詔參

秘書丞秘書本有一丞時尚未轉遂以楨為右丞右丞之置自楨始也

檀道論晉陽秋曰太元十八年王謚為秘書丞乃表前尚書殷允中書郎張敞太子後率郗儉之故太常桓石秀是多書之家請秘書郎分局採借

齊書曰王儉字仲寶為秘書丞上表求校墳籍依七略撰七志四十卷獻之

又曰張率字士簡吳郡人遷秘書丞高祖曰秘書丞天

下清官東南曹緒未有為之今以相處為卿定名譽

齊職儀曰秘書丞銅印墨綬

南史曰劉孝綽遷秘書丞武帝謂舍人周捨云第一官
常用第一人故以孝綽居此職

後魏書曰李彪字道固遷秘書丞分領著作事自武成
帝已來至於太和崔浩高允著述國書編年序錄為春
秋之體遺落時事一二無存彪與秘書令高祐始奏從
遷固之體創為紀傳表志之目焉

又曰李輔字伯尚少有重名高祖每云此李氏之千里駒勅撰太宗起居注尋遷秘書丞

後周書曰柳虬為秘書丞時秘書雖領著作不參史事自虬為丞始令監掌焉

王肅論秘書表云青龍中議秘書丞郎與博士議郎同職近日月宜在三臺上

又曰秘書丞郎宜比尚書郎侍御史今侍御史乘犢車奏事用尺一秘書丞郎乘鹿車猶用尺奏恐非陛下崇

儒之本意也

秘書郎

六典曰秘書郎四人從六品上晉起居注云武帝遣秘書圖書分為甲乙丙丁四部使秘書郎各掌其一焉

魏志曰王基字伯興東萊人也時青土初定刺史王凌特表請基為別駕後召為秘書郎凌復請還之司徒王朗辟基凌又不遣朗書勅州曰取宿衛之臣留秘閣之吏所希聞也凌猶不遣凌流稱青土蓋亦由基協和之

輔也

又曰鍾會字士季敏惠夙成時蔣濟著論謂觀其眸子
可以知人會年五歲見濟濟大奇之正始中以賜官郎
中為秘書郎

蜀志曰郤正字令先安貧好學博涉墳籍弱冠能屬文
入為秘書史轉令史遷秘書郎性澹於榮利尤耽文章
自司馬王楊班傅張蔡之傳遺文篇賦及當世美書善
論益部有者則鑽鑿推求略皆寓目

王隱晉書曰鄭默字思元為秘書郎刪省舊文除其浮穢時陳留虞松為中書令謂默曰而今而後朱紫別矣又曰左思專思三都賦杜絕人事自以所見不博求為秘書郎

虞預晉書曰司馬彪少篤學不倦好色薄行不交人事專精學問泰始中為秘書郎後轉為丞

晉太康起居注曰秘書丞桓石綏啟校定四部書詔郎中四人各掌一部

晉令曰秘書郎掌中外三閣經書覆省校閱正定脫誤
沈約宋書曰秘書郎四人後漢校書郎也

又曰蕭慧開雖貴戚而素服簡素初為秘書郎秘書著
作並名家年少慧開意趣與之多不同比肩或三年不
共語

宋書曰王敬弘子恢之為秘書郎使求為奉朝請與恢
之書曰秘書有限故有競朝請無限故無競吾欲使汝
處無競之地文帝許之

梁書曰張纘字伯緒為秘書郎固求不遷欲遍觀閣內
圖籍

後魏書曰高謚字安平有文武才度天安中以功臣子
召入禁中除秘書郎典秘閣謚以墳典殘缺奏廣訪郡
邑大加繕寫由是代京圖籍莫不審正

通典曰宋齊秘書郎皆四員尤為美職皆為甲族起家
之選待次入補其居職例十日便遷

又曰秘書郎自齊梁之末多以貴遊子弟為之無其才

實故當時諺曰上車不落則著作體中何如則秘書

又曰王肅表曰臣以為秘書職于三臺為近密中書郎
在尚書丞郎上秘書丞郎宜次尚書郎下不然則宜次
侍御史下秘書丞郎俱四百石遷宜比尚書郎亦出宜
為郡此陛下崇儒術之盛旨也尚書郎侍御史皆乘犢
車而秘書丞郎獨乘鹿車不得朝服又恐非陛下轉臺
郎以為秘書丞郎之本意也

太平御覽卷二百三十三

欽定四庫全書

子部

太平御覽卷二百三十九

詳校官侍讀學士臣沈咸熙

員外郎臣牛稔文覆勘

總校官降調編修臣倉聖脈

校對官學正臣常循

謄錄監生臣舒秀岐

欽定四庫全書

太平御覽卷二百三十四

文選

職官部三十一

著作郎

著作郎

著作郎

續漢書曰弘農楊彪字文先多識博聞與諸郎著作東

宋 李昉等 撰

著作佐郎

正字

觀

王隱晉書曰陳壽為著作佐郎遷大著作

又曰陸士衡以文學為秘書監虞濬所請為著作郎議

晉書限斷

又曰何嵩善史漢為著作

晉書曰元康元年詔著作郎舊隸中書而秘書既典司

文籍今改中書著作郎為秘書著作郎

晉中典書曰孫盛歷散騎常侍秘書監常領著作

又曰孫綽為散騎常侍領大著作於時才筆之士綽為其冠

又曰李充為大著作於時典籍混亂充刪除煩重以類分作四部秘閣以為永制

又曰謝沈為祠部郎何充庾冰以沈有史才遷大著作晉太興起居注曰元帝依故事召陳郡王隱待詔著作單衣介幘朔望朝著作之省

沈約宋書曰何承天除著作郎撰國史承天時年已老

而著作郎並名家年少荀伯子嘲之常呼為妳母承天
曰卿當云鳳凰將九子妳母何言耶

又曰著作郎後漢官後漢已來太史但掌天文律歷而
已其國記撰述悉在著作江左王導表著作為史官是
也後漢東觀有著作郎

後魏書曰崔浩好文學時人莫及天興中給事秘書轉
著作郎太祖以其工書常置左右太祖季年威風嚴峻
宮省左右多以微過莫不逃隱浩獨恭勤不急或終日

不歸太祖知之勅命賜以御粥其砥直任時不為窮通改節皆此類也

又曰程駿拜著作郎顯祖屢引與論易老之義顧謂羣臣曰朕與此人言意甚閒暢又問駿曰卿年幾何對曰臣今六十有一顯祖曰昔太公既老而遭文王卿今遇朕豈非早也駿曰臣雖才謝呂望而陛下尊過西伯覲天假餘年竭六韜之效

又曰韓顯宗除著作郎高祖曾謂顯宗及程靈虬曰著

作之任國言是司卿等之才朕自委悉中省之品卿等
所聞若欲取古人班馬之徒固自遼濶若求之當代文
學之能卿等應推崔孝伯

又曰趙逸為赫連屈丐著作郎世祖平統萬見逸所書
曰此豎無道安得為此言乎作者誰也其速推之司徒
崔浩進曰彼之謬述亦猶子雲之美新皇王之道固宜
容之世祖止

三國典略曰齊主以其著作郎祖珽數上密啟命中書

門下二省斷珽奏事初珽為秘書郎用芳林通略質樗蒲錢又陳元康被傷將死憑珽作書屬家累并云祖喜邊有少許物宜早索取珽不通此書喚喜私問得金二十五錠唯與喜二錠餘並自入祖喜告康二弟叔謹李據等叔謹以語楊愔愔顰眉答曰恐不益亡者因此得停其後齊文宣以珽為秘書丞盜遘略事發付平陽王淹令錄珽付禁淹遣使收珽珽便私逃黃門侍郎高德正謀云但宣命向秘書稱奉并州進止須經史各部仰

丞親自檢校催遣如此則珽意自安夜當還宅然後掩
捉之果如德正所圖遂縛送廷尉據犯當死文宣以珽
伏事先代除名為民愛其才伎令直中書普選勞舊遷
為著作

唐書曰著作郎鄧隆上表請編錄御製詩集太宗冲讓
不許隆好學多伎王充兄子太之守河陽也引隆為賓
客大見親遇太宗攻洛陽遣書諭太隆為太復書言辭
不遜洛陽平後隆懼罪變姓名自號隱玄先生竄於白

鹿山黃冠野服不接人事貞觀初徵授國子主簿與博士崔仁師昌黎慕容善行弘農劉顥新野康安禮河東敬播俱為修史學士隆負宿罪猶不自安太宗聞之遣房玄齡謂之曰爾之為王太作書誠合重責但各為其主於朕何有惡哉朕今為天子何能追責匹夫之過爾宜怛然勿懷危懼也擢校著作郎及脩史成尋卒撰東都記三十卷為學者所重

又曰龍朔二年改著作郎為司文郎中佐郎為司文郎

又曰劉允濟傳垂拱四年明堂初成允濟奏上明堂賦以諷則天甚嘉歎之手製褒美拜著作郎

陶氏職官要錄曰著作郎舊視通直郎史才富博者為之

應亨集讓著作表曰自司隸校尉奉至臣五葉著作不絕鄉族以為美談

著作佐郎

王隱晉書曰武帝欲以郭琦為著作佐郎問尚書郭彭

彰憎琦不附已答詔不識上曰若如卿言烏丸家兒能
事卿即堪郎矣及趙王倫篡又欲用琦琦曰我已為武
帝吏不能復為今世吏終於家

又曰華嶠漢書十典未成秘書監繆徽奏嶠少子暢為
著作佐郎卒成十典

晉中興書曰郭璞奏南郊賦中宗見賦嘉其才以為著
作佐郎

又曰華譚為秘書監時晉陵朱鳳吳郡吳震等以單家

子有史才白首衡門譚薦二人擢補著作佐郎並皆稱職

沈約宋書曰謝裕字景仁陳郡陽夏人也會稽王世子元顯嬖人張法順權傾一時內外無不造門者唯景仁不至年三十方為著作佐郎桓玄誅元顯見景仁謂四坐曰司馬庶人父子云何不敗遂令謝景仁三十方作著作佐郎

後魏書曰宋卞字義和為著作佐郎尋除尚書殿中郎

中高祖曾因朝會之次歷訪治道卞年少官微自下而對聲姿清亮進止可觀高祖稱善者久之因是大被知遇賜名為卞意取卞和獻玉楚王不知寶之理也

後周書曰黎景熙字明正定古今文字於東閣大統末除安西將軍尋拜著作佐郎於時倫輩皆位兼常伯車服華盛唯李明獨以貧素居之而無愧色又勤於所職著述不怠然性尤專固不合於時是以一為史官十年不調

張華別傳曰陳壽好學善著述除著作郎當時夏侯湛等多欲作魏書見壽所作即壞已書

文士傳曰東晉應司空辟入府六日除佐著作郎著作西觀撰晉書草創三帝紀及十志

又曰張載作濛汜賦太僕傳玄見賦歎息稱善以車迎載言談終日玄深貴重載遂知名起家徵為佐著作郎

校書郎

六典曰校書郎八人正九品上掌讎校典籍刊正文字

漢書曰劉歆字子駿少以通詩書能屬文召見成帝時
待詔宦者署為黃門郎河平中受詔與父向領校秘書
講六藝傳記諸子無所不究

又曰王莽誅劉棻時揚雄校書天祿閣上治獄使者來
欲收雄雄恐不能自免迺從閣上自投下幾死莽曰雄
素不與事何故在此問其故迺劉棻嘗從雄學作奇字
雄不知情有詔勿問

後漢書曰馬融字季長博通經籍永初二年大將軍鄧

騰聞融名名為舍人四年拜為校書郎中詣東觀典校
秘書是時鄧太后臨朝騰兄弟秉政以為文德可興武
功宜廢遂寢蒐狩之禮息戰陣之法故使猾賊縱橫乘
此無脩融乃感激以為文武之道聖賢不墜五才並用
無或可廢乃上廣成頌以諷諫

唐書曰楊炯華陰人幼聰敏博學善屬文應神童舉拜
校書郎為崇文館學士

正字

六典曰正字四人正九品下掌定典籍刊正文字

唐書曰陳子昂苦節讀書尤善屬文高宗靈駕將還長安子昂詣闕上書陳東都形勝可以安置山陵關中儉旱西行不便則天召見奇其對拜麟臺正字

又曰吳通玄道瓘為太子諸王授經而通玄兄弟出入禁掖恒侍太子遊通玄與兄通微俱博學善屬文文采綺麗通玄幼應神童釋褐秘書省正字

又曰蘇弁字元容京兆武功人也弁少有文學舉進士

授秘書省正字

唐明皇雜錄曰劉晏以神童為秘書省秘書正字上問晏曰正字正得幾字晏曰天下字皆正惟有朋字未正玄宗大奇之

太平御覽卷二百三十四